




CIDERWORLD

L'escaparate alemán pa la sidre internacional

Los díis 28 y 29 d'abril tuvo llugar la feria internacional de sidres Ciderworld, allugada na ciudá alemana de Fráncfort del Meno (Frankfurt am Main). Esti ye un evento con varios años de solera, entamando en 2013 comu continuación de la feria Apfelwein Weltweit (sidre d'alrodiu'l mundiu, n'alemán) y consta d'unos premios pa los llagareros participantes, tasties de sidre guíaes pol entamaor y sommelier Michael Stöckl y tastia abierta al públicu. Michael Stöckl ye'l direutor d'esti eventu y el primer sommelier de sidre d'Alemaña y esti añu pudo esfrutar del ésitu d'esta edición tantu pol númberu de llagares participantes comu pola perbona calidá de les destremaes sidres presentaes.

Los premios CiderWorld Awards danse añalmente a les

meiores sidres presentaes a concursu, pudiendo algar medalles d'oru, palta y bronce siguiendo un másimu de puntuación de 120 puntos, destremando delles categoríes. Estes débense a la necesidá d'aplicar criterios a productos tan destremaos comu pue ser la sidre asturiana, l'alemana o la xaponesa, afincando normes d'evaluación d'aroma, tastu, collar y presencia xeneral dientru les seiciones: sidre ensin gas, sidre esplumoso, destilaos, sidre ensin alcol, sidres con saborgos y mezclaes, postres y llicores. Esti premiu carauterízase por ser de calter internacional y científicu, siendo'l resultáu de la combinación única d'anális rigurosu de los productos presentaos y esperiencia internacional del xuráu, tendencia ca vegá más presente nos xuraos de



Nuevas experiencias, muchos amigos, ya interés de los medios de comunicación franceses pola presencia asturiana.

calter internacional comu los del Salón Internacional de les Sidres de Gala (Xixón, Asturias). Les medalles nesta competición alemana vienen sofitaes pola Universidá de Geisenheim, el sociu científicu del Premiu CiderWorld, que ye una de les universidades líderes nel mundiu nel tarrén de la teunoloxía de bébores, siendo toles sidres presentaes analizaes nel Istitutu d'Investigación de Bébores d'esta prestixosa institución. Dempués d'esti análisis, un xuráu internacional d'espertos tsstia y evalúa tolos productos acordies col esquema de 120 puntos de clasificación, respetando siempre les idiosincracies propies de les tradiciones sidreres de ca país y rexón representaes.

La presentación d'esta edición 2023 tuvo llugar na sala

cine Astor My Zeil el vienes 28 d'abril en Frankfurt, tantu pa la prensa llocal comu internacional, onde dellegaos de LA SIDRE desplazáronse a cubrir esti eventu, comu tolos años, y de pasu dar puxu a la presencia y cultura sidrera asturianaes nesta celebración de la diversidá sidrera. Tolos años hai un país participante que ye'l invitáu d'honor, pero esti añu'l focu d'atención nun taba en denguna nación sidrera en particular sinón na pumarada comu modelu d'esplotación agrícola que permite y supón un finxu pa la producción de sidre nel país que seya, al marxe de les tradiciones sidreres de ca llagar.

Nel programa del eventu otra parte importante ye la



parte abierta al públicu Cider World'23 Expo, la Feria Internacional de la Sidre de Frankfurt, na que l'audiencia alemana averóse al xardín botánicu Palmengarten (xardín de les palmeres), y por un preciu de 25 euros, pudo tastiar toles sidres presentaes a concursu de man de los propios llagareros que nesti verdi entornu ufiertaben les sos meyores y más novedoses sidres.

La participación asturiana nesta edición llimitóse a la sidre El Gaitero, que fexo bona amuesa de les sidres axampanaes y de mesa del nuesu país. Un puestu con información turística n'alemán ya inglés averaba a la

población llocal a la nuesa verde patria col envís de promocionar el turismu sidreru y la conocencia les nueses tradiciones alrodiu de la sidre.

Los dellegaos internacionales de la Fundación Asturies XXI y LA SIDRE aprovecharon esta ocasión p'afitar relaciones tantu colos entamaores de Ciderworld comu con llagareros participantes nel nuesu eventu SIGA (Salón Internacional de les Sidres de Gala) que, cuntandu col merecíu reconocimientu internacional, celebrará los díis 28 setiembre a 1 d'ochobre d'esti añu la so decimotercer edición.

Los psicólogos cambien vides

Meyorar ye posible con ayuda

Ana Fernández Marqués - Psicóloga y Sicoanalista - 684 64 00 81